

EFESIOS

San Pablopa K'art'a P'ãda Éfeso P'uurudepema Ijãapataarãmaa

San Pablo, Jesucristopa jirit'eradapa na k'art'a p'ãji. K'ĩsiapata na k'art'a p'ãji Romade, carcelde bak'ãri. Na k'art'ade Pablopa jara bi Ak'õrepa k'ĩsia iru bi ichideerã-it'ee, na eujãde p'ani misa mãik'aapa it'ari panadak'ãri. Pablopa k'inia baji na k'art'a pedeepidamerã jõmaweda ijãapataarãmaa chip'epata chaa.

Salude jarap'eda, naapiara jara bi Tachi Ak'õrepa eperãarã audú k'inia iru bapari (caps. 1.1–2.10). Maperã judiorã, judio-eerã paara jiripari Cristode ijãapataadamerã mãik'aapa araa p'anapataadamerã iru ome (cap. 2.11-22). Jara bi ichi mimiapari Cristo-it'ee, Cristopa jõmaweda k'inia iru bapari perã (cap. 3). Jara bi Cristode ijãapataarã k'ap'ia apai pik'a p'ani mãik'aapa iru ma k'ap'ia porok'a bi (cap. 4.1-16). Maperã p'ek'au k'achia oo amaadaipia bi (cap. 4.17-32). Jara bi ijãapataarã idaa pik'a bide p'anapataadaipia bi (caps. 5.1–6.9) mãik'aapa sãga chõodaipia bi netuara ome (cap. 6.10-20). T'ẽepai jara bi ichia na k'art'a tee peit'ee Tíquico ome (cap. 6.21-24).

Salude pëida

¹ Mi, Pablopa na k'art'a p'ãru Jesucristode wãara ijãapataarãmaa, Éfeso p'uurude p'ani. Tachi Ak'õrepa k'inia bada perã, mi jirit'eraji Jesucristopa peimerã ichi ũraa jarateede. ² Mia

k'inia bi Tachi Ak'õrepa Tachi Waibia Jesucristo ome parã pia ak'i p'anadamerã. Mãgá k'ãiwee p'anapataadait'ee.

Cristo k'ap'ia pari Tachi Ak'õrepa tachi k'aripapari

³ jT'ãri o-ãa gracias jaradãma Tachi Ak'õremaal jiru Tachi Waibia Jesucristo Ak'õre! Iruata tachi bendiciaji tachi araa p'anapik'ãri Cristo ome, irude ijãapata perã. Cristo k'ap'ia pari irua it'aripema ne-inaa pia k'ãra t'ãdoo ooji tachi k'aripait'ee, it'aa wãdamerã piudak'ãri. Nãgee ne-inaa pia ooji tachi-it'ee. ⁴ Na eujã ooi naaweda, Tachi Ak'õrepa tachi jirit'eraji Cristode ijãadamerã. Mãga ooji tachi awara bi k'inia bada perã, ichi k'ãrapite p'ek'au k'achia wëe p'anadamerã. ⁵ Ma awara iru t'ãri pia bapari perã mãik'aapa tachi k'inia iru bapari perã, k'ãsia iru baji tachi ichi warrarã papiit'ee ichi Warra Jesucristode ijãapata k'aurepa. ⁶ Mãgá t'ãri piara bapari perã jõmaarã k'ãyaara, t'ãri o-ãa gracias jaradãma irumaa. Maperã tachia ne-inaa oo-eeta, ichideerã papiji ichi Warra k'inia iru bi k'ap'ia pari. Mãga ooji ichi Warra pëik'ãri piumerã tachi pari. ⁷ Ichi warra waa bat'ada k'aurepa tachi o k'achiadeepa k'aripa ataji atuanaadamerã mãik'aapa tachia p'ek'au k'achia oopata wëepapiji. ⁸ jMãga ook'ãri, wãara tachi pia ooji! Mamãda mãgapai-e. ⁹ Mãga ook'ãri, ichiaba tachi k'ãsia k'awaapiji ne-inaa pia oo k'awaadamerã irua oopi bik'a. Ichiaba k'awapiji ne-inaa awaraarãmaa waide k'awapi-e pada. K'awapiji ichia at'ãri k'ãsia iru bi ooit'ee Cristo k'ap'ia pari. ¹⁰ Nãga k'ãsia iru bi. Irua

k'inia bak'ãri, ewari cherude ne-inaa jõmaweda na p'ek'au eujãdepema mãik'aapa it'aripema biit'ee Cristo jua ek'ari.

¹¹ Tachi Ak'õrepa ne-inaa jõmaweda oopari ichia k'inia bik'a. Mapa ichia k'ĩsia iru badak'a, tai judiorã naapiara jirit'eraji ichideerã papiit'ee. Mãga ooji Cristode ijãadak'ãri. Tai mágá ichideerã p'anadairã, iru p'anadait'ee jõmaweda irua k'ĩsia iru bi ichideerã-it'ee. ¹² Tai judiorã mágá naapiara jirit'eraji, ni p'anadap'edaa perã Cristo waya cheit'ee na eujãdee. Tachi Ak'õrepa k'inia baji taipa jõmaarãmaa jaranadamerã iru jõmaarã k'ãyaara waibiara bi. ¹³ Mãpai taipa mãga oodak'ãri, parãpa ùrijida Tachi Ak'õrepa wãarata jara pëida Cristode. Mágá k'awaadak'ãri Cristopa eperãarã o k'achiadeepa k'aripa atai, parãpa ichiaba irude ijãajida. Mapa Tachi Ak'õrepa parã auk'a ichideerã papiji mãik'aapa parã k'ap'iade ichi Jaure ba chepiji, irua ooit'eeda adak'a. Eperãpa tauchaa bïparik'a ichi net'aade jõmaarãpa k'awaadamerã ichi ma net'aa chipari, mãga pik'a Tachi Ak'õrepa ichi Jaure ba chepiji ichideerã k'ap'iade, jõmaarãpa k'awaadamerã ichita ãchi chipari. ¹⁴ Ma Jaure k'aurepata tachia k'awa p'ani wãara iru p'anadait'ee jõmaweda irua k'ĩsia iru bi ichideerã-it'ee. Ma awara k'awa p'ani ichideerã perã ewari cherude tachi p'ek'au k'achia ooyaa bi k'ap'iadeepa aweda uchiadait'ee, wãdak'ãri iru truadee. Mãga pak'ãripi, wãara t'ãri o-ïa gracias jaradait'ee irumaa, iru k'ĩra wãree pia k'awadait'ee perã.

Pablopa it'aa iidida Cristode ijãapataarã pari

15 Tachi Ak'õrepa ma jõma ooda perã tachi-it'ee, mia k'awaadak'ãriipa parã wãara ijãa p'ani Tachi Waibia Jesude mãik'aapa parãpa jõma Tachi Ak'õredeerã k'inia iru p'ani, mia nãga oopari.

16 It'aa t'ik'ãri Tachi Ak'õremaa, ichita gracias jarapari parã pari. 17 Iidipari Tachi Waibia Jesucristo Ak'õre k'ira wãree bĩmaa, irua parã k'isia k'awaapimerã ichi Jaure k'ap'ia pari. Mãgã iru wãara pipiara k'awadait'ee. 18 Parãpa mãgã iru pipiara k'awa wãdak'ãri, t'ãride k'awadait'ee Tachi Ak'õrepa parã jiriji ichideerã papiit'ee. Mãga ooji, jai-idaadak'ãri iru trua k'ira wãreedee wãdamerã mãik'aapa iru p'anadamerã jõmaweda irua k'isia iru bi ichideerã-it'ee. 19 Ichiaba parãpa k'awaadait'ee Tachi Ak'õrepa ne-inaa jõmaweda oopari. Iru jõmaarã k'ãyaara waibiara bapari perã, tachi ijãapataarã k'aripai Cristo k'aripadak'a.

20 Cristo piup'eda, chok'ai p'irabaipiji mãik'aapa su-ak'i beepiji it'ari ichi juaraare. 21 Mama biji ak'ipi k'inia bada perã Cristo jõmaarã k'ãyaara waibiara bi. Jõmaweda iru jua ek'ari ichita p'anapataadait'ee, na p'ek'au eujã jõru pijida. Na p'ek'au eujãdepema poro waibiarã jõmaweda iru jua ek'ari p'anadait'ee, jõmaweda charraarã mãik'aapa reyrã paara. Ichiaba na p'ek'au eujãdepema-eerã iru jua ek'ari p'anadait'ee, angeleerã mãik'aapa netuara eere p'anãrã paara. 22 Tachi Ak'õrepa ma jõmaweda Cristo jua ek'ari mãgã bida perã, iru ne-inaa jõma poro waibia; tachi ijãapataarã poro waibia ichiaba. 23 Iru tachi porok'a bi; jõdee tachi ijãapataarã iru k'ap'ia apai pik'a p'ani, chok'ara p'ani mĩda. Tachi ijãapataarã wẽe, Cristopa oo-e pai

Tachi Ak'õrepa oopi k'inia bik'a na p'ek'au eujãde. Jõdee tachia pida p'oyaa ooda-e pai Tachi Ak'õrepa oopi k'inia bik'a, Tachi Poro Waibia Cristo wëe. Cristo k'aurepata ne-inaa jõmaweda nĩbi.

2

Tachi Ak'õrepa tachi k'inia iru bapari perã, atuada-e pait'ee

¹ Cristode ijãadai naaweda, Tachi Ak'õre-it'ee parã piu pik'a p'anajida, irua oopi bik'a oodaamaa p'anapatap'edaa perã mãik'aapa p'ek'au k'achia ooi awaa p'anapatap'edaa perã. ² Parãpa na p'ek'au eujãdepemaarãpa ne-inaa k'achia oopata k'ĩra t'ãdoo oo wãpachida. Oo k'inia p'anapachida jaure k'achia beerã poro waibiaapa oopidak'a. Mãgĩ Netuara Poro Waibiaapa k'ĩsiapipari Tachi Ak'õrepa oopi bik'a oodaamaa p'aniirãmaa, audupiarã mãga p'anadamerã. ³ Wãara Cristode ijãadai naaweda, tachi jõmaweda mãgee k'achia oopataarãk'a p'anapachida. Oopachida tachia oo k'iniata, tachi p'ek'au k'achia ooyaa bi k'ap'iaapa oopidak'a mãik'aapa tachia pariatua k'ĩsiadap'edaak'a. Mãgã p'anadap'edaa perã, Tachi Ak'õre k'ĩraupi p'anapachida mãik'aapa atuadait'ee paji apemaarã p'ek'au k'achia oopataarã ome. ⁴ Mãgã piu pik'a p'anajida mĩda tachia p'ek'au k'achia oopata k'aurepa, Tachi Ak'õrepa tachi audú chupiria k'awaaji. Tachi k'inia iru bada perã, ⁵ araa p'anapiji Cristo ome, maadamãiipa ichita chok'ai p'anapataadamerã iru k'ĩrapite. Irua mãgã parã pia oo k'inia bada perã, parã o k'achiadeepa k'aripa ataji atuanaadamerã. Írã

tachi ichita chok'ai p'ani Tachi Ak'õre k'ĩrapite. ⁶ Tachi Ak'õrepa tachi Jesucristo ome araa p'anapida perã, jaradai irua Cristo chok'ai p'irabaipik'ãri, tachi auk'a mãgã chok'ai p'irabai pik'apiji. Ma awara Tachi Ak'õrepa Cristo su-ak'i beepik'ãri ichi juaraare it'ari, tachi auk'a mama su-ak'i p'anee pik'apiji, Cristo ome araa p'anapata perã. ⁷ Mãga ooji jõma t'ëe cherutaarãmaa ak'ipiit'ee ichia tachi Jesucristode ijãapataarã pia oopari, ichi t'ãri pia bapari perã. ⁸ Maperãpi parã Cristode ijãadak'ãri, Tachi Ak'õrepa parã o k'achiadeepa k'aripa ataji atuanaadamerã. Pãchi k'ĩradoopa ma o k'achiadeepa p'oyaa uchiada-e paji. Tachi Ak'õrepapai eperãarã madeepa uchiapii. ⁹ Eperãarã ãchi k'ĩradoopa madeepa uchiada paara, mãgak'ajida: “Tachia pia oopata k'aurepa Tachi Ak'õrepa k'aripaji.” Mamãda mãga-e. Tachi Ak'õrepapai tachi ijãapataarã mãgã o k'achiadeepa k'aripa atapari, apida pedee audua pedeenadamerã. ¹⁰ Iruata tachi ooji Cristode ijãadamerã mãik'aapa iruata tachi araa p'anapiji Cristo ome. Mãga ooji Jesucristo k'ap'ia pari ne-inaa pia oodamerã, irua naaweda k'ĩsia iru badak'a.

Cristo ome araa p'anapataarã k'ãiwee p'anapata

¹¹ K'ĩsíati parã ijãadai naaweda p'anapatap'edaade. Naaweda parã Tachi Ak'õrede ijãadak'aa paji. Judio-eerã perã, k'awada-e paji Ak'õrepa jarada judiorãmaa, imik'ĩraarã k'ap'ide tauchaa bidamerã. Mapa judiorã, “chi tauchaa iru beerãda” apataarãpa at'ãri parã judio-eerã k'ĩra unuamaa iru p'anapata mãik'aapa parã ãpíte “chi

tauchaa wēe beerã” apata. ¹² Ichiaba Cristode ijãadai naaweda, parãpa k'awada-e paji Tachi Ak'õrepa Israel pidaarã jirit'erada ichi p'uuru pidaarã papiit'ee. Mapa maarepida k'awada-e paji Tachi Ak'õrepa jarada ãra chonaarãmaa: aba pëiit'eeda aji, eperãarã k'aripade. Mãgá Tachi Ak'õre k'awada-e p'anadap'edaa perã, ichiaba k'awada-e paji sãga o k'achiadeepa uchiadai. Mãgá p'anapachida na p'ek'au eujãde. ¹³ Mamĩda ãra mãgá p'anada-e. Ijãapata perã Jesucristo piuji parã pari, araa p'anapata iru ome mãik'aapa Tachi Ak'õredeerã p'ani iruk'a. Naaweda t'imí pik'a p'anapachida Tachi Ak'õre ik'aawaapa. Mamĩda ãra Jesucristo waa bat'ada k'aurepa parã Tachi Ak'õre k'ait'a pik'a p'ani, ichideerã perã.

¹⁴ Maperã parã k'ãiwee p'anadai judiorã ome, ãra auk'a Cristode ijãadak'ãri parãk'a. Ichi k'aurepa waa k'ãrau p'anada-e. Jĩp'a araa p'anapata p'uuru apai pik'a. ¹⁵ Naaweda Tachi Ak'õrepa ichi ãraa Moisesmaa p'ãpiji, judiorãpa ma ãraade jara bik'a oodamerã. Ma ãraa k'aurepa judiorã awara p'anapachida parã judio-eerã k'ãyaara. Mamĩda Tachi Ak'õrepa ãraa chiwidi jara pëiji Cristo k'ap'ia pari. Mapa Cristo piuk'ãri, Ak'õrepa chi judiorã irude ijãa p'anadap'edaarã uchiapiji ma naawedapema ãraa jarada jua ek'ariipa. Mãga ooji Cristo k'aurepa judiorã judio-eerã ome p'uuru apai pik'a p'anadamerã mãik'aapa oodamerã irua oopi bik'a. Tachia mãga oodak'ãri, wãara k'ãiwee p'anapata. ¹⁶ Ma awara Cristo kurusode piuk'ãri, tachi t'ãri auk'a bipiji Tachi Ak'õre ome. Naaweda tachia p'ek'au k'achia oopata k'aurepa Tachi

Ak'õrepa tachi pia ak'i-e paji. Mamĩda Cristode ijãadak'ãri, araa p'aneejida iru ome, k'ap'ia apai pik'a. Mapa ãrá Tachi Ak'õrepa tachi pia ak'ipari. Ichiaba tachi k'ĩrau-ee para bapari.

¹⁷ Cristo cheji na pedee pia jarait'ee: ichiata eperãarã k'ãiwee p'anapipari. Mãga oopari parã Tachi Ak'õre ik'aawaapa t'imí pik'a p'anadap'edaarãmaa mãik'aapa tai k'ait'a pik'a p'anadap'edaarãmaa paara. ¹⁸ ãrá irude ijãapata perã, tachi jõmaweda Tachi Ak'õre k'ait'a p'anapataadai iru Jaure k'ap'ia pari.

¹⁹ Maperãpi parã waa p'anadak'aa k'ĩra tewaraarãk'a. Ma k'ãyaara auk'a p'anapata awaraarã Cristode ijãapataarãk'a, auk'a Tachi Ak'õredeerã perã. ²⁰ Parã te mãudee oodák'api p'ani. Tai chi jirit'eradaarã Cristopa ooda jarateenadamerã basadepema mãuk'api p'ani Tachi Ak'õre pedee jarapataarã ome. Jõdee Jesucristo chi te k'idaadepema mãu pi-iara pik'a bi, ichi k'aurepa jõma ijãapataarã araa p'anapata perã. ²¹ Tachi Ak'õrepa parã ijãapataarã araa p'anapipari Cristo ome mãik'aapa awaraa ijãapataarã ome. Mãgá tachi ichi tek'a oo wãpari mãik'aapa tachi awara bi wãpari ichi-it'ee, irumaa it'aa t'ĩpataadamerã. ²² Tachi mãgá araa p'anapata perã Cristo ome, tachita Tachi Ak'õre te waibiak'a p'ani, iru Jaure tachi ome bapari perã.

3

Tachi Ak'õrepa Pablo jirida judio-eerãmaa jara-teenamerã

¹ Maperã mi, Pablopa jarateepari Jesu-
 cristopa ooda, parã judio-eerã ichiaba araa
 p'anapataadamerã iru ome. Ma k'aurepata ñrá
 mi carcelde bi. ² ¿Parãpa nãga k'awa p'ani-ek'ã?
 Tachi Ak'õre t'ãri pia bapari perã, parã pia oo
 k'inia bi. Mapa mi jirit'eraji na mimia oomerã
 parã-it'ee. ³ Naaweda Tachi Ak'õrepa k'ïsia iru baji
 mãgã parã pia ooit'ee. Mamïda mãga k'awapi-e
 paji naawedapemaarãmaa. Jïp'a mimaa k'awapiji,
 mia pedee chok'ara-eepa et'ewa jaradak'a na
 p'ãdade. ⁴ Ma pedee waya leedak'ãri, k'awaadai
 Tachi Ak'õrepa wãara mimaa k'awaapiji ichia k'ïsia
 iru bada ooit'ee Cristo k'ap'ia pari. ⁵ Naaweda
 eperã apidaapa ma k'ïsia iru bada k'awada-e paji.
 Mamïda ñrá k'awaapiji ichia awara bidaarãmaa;
 mãgãrã ichia jirit'eradaarã mãik'aapa ichi pedee
 jarapataarã. Mãgã k'awaapiji ichi Jaure k'ap'ia
 pari. ⁶ Nãga k'ïsia iru baji. Judio-eerãpa ijãadak'ãri
 Cristo piuji ãchi k'aripait'ee, auk'a p'ani judiorã
 ijãapataarã ome. Tachi Ak'õrepa ãchi auk'a araa
 p'anapipari Jesucristo ome, p'uuru apai pik'a
 p'anadamerã judiorã ome. Irua ooda k'aurepa
 ãchi auk'a it'aa wãdait'ee mãik'aapa auk'a iru
 p'anadait'ee jõma Tachi Ak'õrepa jarada teet'ee
 ichideerãmaa.

⁷ Tachi Ak'õrepa k'inia bada perã, mi pia
 ooji jirit'erak'ãri jarateenamerã Cristopa ooda
 eperãrã k'aripait'ee. Iruata mimaa mãgã
 jarateepipari. ⁸ Cristode ijãai naaweda, mi
 apemaarã k'ãyaara k'achiara bapachi. Mapa mi-
 it'ee, mi apemaarã ijãapataarã ek'ariara bi. Mamïda
 Tachi Ak'õrepa mi jiriji. Irua mi pia oo k'inia bada

perã, mi jirít'eraji judio-eerãmaa jarateenamerã Cristopa ooda eperãarã k'aripait'ee mãik'aapa irua ne-inaa pia oo k'inia bi irude ijãa p'anirã-it'ee. ⁹ Maperãpi mia jõmaarãmaa jarai Tachi Ak'õrepa na eujã ooi naaweda, k'ĩsia iru bada parã judio-eerã k'aripait'ee. Awaraarãmaa mãga k'awapi-e paji mĩda, Tachi Ak'õre, chi ne-inaa jõmaweda nĩbi oodapa, mĩmaa mãga k'awapiji. ¹⁰ Naawedapemaarãmaa k'awapi-e paji ichia k'ĩsia iru bada judio-eerã-it'ee. K'inia baji ñrapemaarãpa mãga k'awaadamerã. Ichiaba k'inia baji it'aripemaarã, ichi angeleerãpa mãik'aapa netuaraarãpa paara k'awaa wãdamerã iru jõmaarã k'ãyaara k'ĩsia k'awaara bi eperãarã k'aripait'ee. Mãgĩrãpa mãga k'awaadait'ee unudak'ãri judiorã judio-eerã ome p'uuru apai pik'a bi, Cristode ijãapata perã. ¹¹ Wãara Tachi Ak'õrepa ooji ichia ichita k'ĩsia iru badak'a ooit'ee Tachi Waibia Jesucristo k'ap'ia pari. ¹² Maperãpi tachi Cristode ijãajida. Iru ome araa p'anapata perã, waaweeda-e Tachi Ak'õre k'ait'a wãdait'ee it'aa t'ĩdak'ãri. ¹³ Tachi Ak'õrepa ma jõma jara aupada ooda perã tachi ijãapataarã k'aripait'ee, o-ĩa para bati. Mi nama carcelde chupiria nĩbi mĩda parã judio-eerãmaa jaratee k'iniapa, parã pia-ee, k'ĩsia paraa p'anadaik'araa bi. Ma k'ãyaara o-ĩa p'anadaipia bi Tachi Ak'õrepa parã judio-eerã ichiaba pia oo k'inia bairã Cristo k'ap'ia pari.

Cristo k'aurepa Tachi Ak'õrepa tachi k'inia iru bapari

¹⁴ Mia made k'ĩsiak'ãri, Tachi Ak'õre k'ĩrapite bedabaipari mãik'aapa it'aa t'ĩpari irumaa. ¹⁵ Iruta

na p'ek'au eujãdepema ëreerã mãik'aapa it'aripema ëreerã ak'õre, ichia ãra ooda perã. ¹⁶ Tachi Ak'õre jõmaarã k'ãyaara waibiara bapari perã, ne-inaa jõmaweda k'awapari. Mapa mia it'aa iidi bi irua parã choopimerã pãchi t'ãride iru Jaure k'ap'ia pari, mãgá oodamerã irua oopi bik'a. ¹⁷ Iidi bi Cristo bamerã pãchi t'ãride, irude ijãa p'ani misa. Mãgá parãpa Tachi Ak'õre mãik'aapa awaraarã k'inia iru p'anadait'ee. ¹⁸ Ma awara mãgá parã mãik'aapa awaraa ijãapataarãpa k'awaadait'ee Cristopa tachi audú k'inia iru bapari. Ara to t'ai audú jet'ee bik'a, audú teeso bik'a, audú nãpia bik'a, mãga pik'a Cristopa tachi audú k'inia iru bapari. ¹⁹ P'oyaa k'awada-e p'ani mĩda Cristopa tachi mãgá audupai k'inia iru bi, mia iidi bi Tachi Ak'õrepa parãmaa mãga pipiara k'awapimerã. Parãpa wãara mãga k'awadak'ãri, ne-inaa jõmaade Tachi Ak'õrek'a p'anadait'ee.

²⁰ ¡Wãara Tachi Ak'õre jõmaarã k'ãyaara waibiara bi! Ichi tachi ome bak'ãri, tachimaa ne-inaa piara bi oopipari, irumaa iidipata k'ãyaara mãik'aapa tachia k'ĩsiapata k'ãyaara. ²¹ Mapa tachi Jesucristode ijãapataarã, ñrapemaarã mãik'aapa t'ëe cherutaarã, o-ĩa it'aa t'ídama Tachi Ak'õremaa jaradait'ee iru ichita jõmaarã k'ãyaara waibiara bi. ¡Amén!

4

Cristode ijãapataarã k'ap'ia apai pik'a p'ani

¹ Naaweda jaradak'a, mi carcelde bi parã judio-eerãmaa Tachi Waibia Cristopa ooda jarateepari perã. Maperãpi mia parã enenee

nĩbi p'anapataadamerã Tachi Ak'õrepa k'inia badak'a parã naa jirik'ãri Cristode ijãadamerã. ² Nãga p'anapataadaipia bi: maarepida auduada-ee; t'ãri pia jõmaarã ome; choopari nepirade bi mĩda mãik'aapa k'ĩrau-ee choopari, awaraarãpa parã ome nepira jiri p'ani pijida. Mãga p'anapataadaipia bi chik'inia p'ana k'inia p'anadairã. ³ Mãgã chik'inia p'anapataadak'ãri, Tachi Ak'õre Jaurepa parã k'ãiwee p'anapiit'ee, wãara araa p'anapataadamerã awaraa ijãapataarã ome. Mapa ne-inaa jõma pia oodaipia bi mãga p'anapataadamerã. ⁴ Jõma Cristode ijãapataarã k'ap'ia apai pik'a p'anapata mãik'aapa Tachi Ak'õre Jaure apai iru p'anapata. Tachi Ak'õrepa parã jirik'ãri Cristode ijãadamerã, auk'a ijãa p'aneejida Cristo k'aurepa parã wãdait'ee Ak'õre truadee. Ma-it'ee aupai Tachi Ak'õrepa parã jiriji. ⁵ Cristo apai iru p'ani. Iruta Tachi Waibia. Mapa irudepai ijãapata mãik'aapa poro choopipata ak'ipidait'ee iru ome araa p'ani. ⁶ Tachi Ak'õre apai iru p'ani. Iru tachi jõmaarã Ak'õre. Iru Tachi Waibia. Irua ne-inaa pia oopipari tachimaa, tachi ome bapari perã.

⁷ Mamĩda tachi ijãapari chaa Cristopa ne-inaa pia awara-awaraa oo k'awaapipari, mãgã awaraarã k'aripadamerã. Tachi chaachaa auk'a oo k'awaapi-e. Oo k'awaapipari ichia k'inia bik'a. ⁸ Mãga ook'ãri, oopari Tachi Ak'õre Ũraa p'ãdade jara bik'a:

'It'aa wãk'ãri, p'oyaaji ichi k'ĩra unuamaa iru p'anadap'edaarã mãik'aapa eperãarãmaa ne-inaa pia tee pëiji.' (Sal

68.18)

⁹ Ma ũraa p'ädade "it'aa wāk'ãri" ak'ãri, jara k'inia bi ai naaweda edaa cheji na p'ek'au eujãdee chupiria nĩbade eperã jĩp'aak'a. ¹⁰ Mãgí eperã edaa cheda chi it'aa wãda. Ichi it'aa wãji Tachi Ak'õre bĩmaa, jõmaarã k'ãyaara waibiara bade. Maperãpi iru k'aurepa ne-inaa jõmaweda nĩbi.

¹¹ Ichiata tee pëiji ichi Jaure, mãgipa ichideerãmaa oo k'awaapimerã ne-inaa pia awara-awaraa. Ũk'uru jirit'eraji jarateenadamerã irua ooda mãik'aapa jarada. Ũk'uru biji jarapataadamerã irua jarapi bik'a. Ũk'uru pëiji jõmaarãmaa jarateepataadamerã irua ooda eperãarã o k'achiadeepa k'aripa atait'ee atuanaadamerã. Awaraarã biji ichideerã ak'ipataadamerã mãik'aapa jarateepataadamerã irua eperãarãmaa oopi k'inia bi. ¹² Ma jõma oo k'awaapiji ichideerãmaa, iru mimia oo wāk'ãti wãdamerã. Mãgá ijãapataarã jõmaweda irude pipiara ijãadait'ee mãik'aapa irua k'inia bik'a p'anapataadait'ee. ¹³ Tachi jõmaarãpa mãga oo k'awaadak'ãri, wãara araa p'anapataadait'ee, auk'a Tachi Ak'õre Warrade ijãadait'ee perã mãik'aapa iru auk'a k'awadait'ee perã. Mãga p'anapataadak'ãri, ne-inaa jõma oo k'awaadait'ee Cristopa oopi bik'a. Chonaarãpa ne-inaa pariatua ooda-e p'anik'a warra chak'eerãk'a, mãga pik'a tachi ijãapataarã ne-inaa pariatua waa ooda-e pait'ee. ¹⁴ Mãgá p'anapataadak'ãri, waa p'anada-e pait'ee warra chak'eerãk'a. Ma k'ãyaara ik'awaa beerãpa Tachi Ak'õre Ũraa awara jaratee chedak'ãri, tachia ijãadak'aa pait'ee ãchia jaratee

p'ani. Pia k'awaa p'anadait'ee āchia jaratee nipapata wāara-e. Mapa k'ūrapida-e pait'ee ma k'īsia k'achia iru beerāmaa. ¹⁵ Ma k'āyaara tachia ne-inaa wāara ijāapataadait'ee. Maperā p'anapataadaipia bi Tachi Ak'ōrepa wāarata jara pēidak'a. Ichita wāarata jarapataadaipia bi chik'inia p'ana k'inia p'anadairā. Māga p'anapataadak'āri, wāara jōma oodait'ee tachi poro Cristopa k'inia bik'a māik'aapa tachi jōmaweda iru k'ap'ia apai pik'a p'anadait'ee. ¹⁶ Tachi ijāapataarā jōma araa p'ani, Cristo k'ap'ia ome apai pik'a p'anadairā. Chik'aripa p'anadak'āri māik'aapa chik'inia p'anapataadak'āri, oo k'awaa wāpata tachi poro Cristopa oopi k'inia bik'a.

Cristo ome sāga p'anapataadaipia bi

¹⁷ Tachi Waibiapa mīmaa nāga jarapiru. Waa p'ananaāti ijāadak'aa beerāk'a. Āchi pariatua k'īsiapata. ¹⁸ Āchi p'āriu pik'a bide p'anadairā, k'awa k'iniada-e Tachi Ak'ōre net'aa. Mapa ijāadak'aa Tachi Ak'ōrepa eperāarā k'aripai atuanaadamerā. Āchi k'īsia k'awada-ee, k'īiri k'isua p'anadairā. ¹⁹ K'īra nejasia wēe pak'oodaida perā, āchia k'achia oo k'iniata ooi awaa p'anapata. Nāgee ne-inaa k'achia oopata: awaraarā wēra k'īapata māirā ome p'ek'au oodait'ee māik'aapa pariatua p'ek'au oo wāpata awaraarā ome.

²⁰ Mamīda taipa parāmaa māga jarateedak'aa paji, jarateedak'āri Cristopa oopi k'inia bi eperāarāmaa. ²¹ Parāpa māgī jarateeda ūrijida. ¿Wāara-ek'ā? Ma awara irude ijāajida māik'aapa k'awaajida Tachi Ak'ōrepa wāarata jara pēida irude. ²² Ma k'aurepata k'awaajida parāpa naaweda

oopatap'edaa k'achia baji Ak'õre k'ĩrapite. Mapa waa m̃ga p'anapataadaik'araa bi. Oo amáati parã p'ek'au k'achia ooyaa bi k'ap'iaapa oo k'inia bik'a. Ma k'aurepa k'achiade p'anapachida m̃ik'aapa pãchi itu k'ũrapipachida k'achia oo k'iniapa. ²³ Ma k'ãyaara pãchi t'ãri chiwidi pik'a papítì Tachi Ak'õremaa m̃ik'aapa k'ĩsìlati irua k'ĩsiapi k'inia bik'a. ²⁴ P'anapatáati k'ap'ia chiwidi iru p'anik'a, Tachi Ak'õrepa ichideerã m̃ga p'anapi k'inia bairã. Tachi ooi naaweda, Tachi Ak'õrepa k'ĩsia iru baji tachi ichik'a p'anadamerã, p'ek'au k'achia w̃e. M̃ga p'anadai, jõma oodak'ãri irua w̃aarata jara p̃ida jara bik'a.

²⁵ M̃ga p'anadait'ee waa seewa jaranáati. Ichita w̃aarata jarapatáati awaraarãmaa, tachi jõmaweda k'ap'ia apai pik'a araa p'anadairã tachi poro Cristo jua ek'ari.

²⁶ 'K'ĩraudaruta pirã, ne-inaa k'achia oonáati.' (*Sal 4.4*)

K'ĩrau p'ananáati ak'õrejĩru baairumaa, ²⁷ Netuara Poro Waibiapa eperã taarã k'ĩrau bi k'achiade baaipipari perã.

²⁸ Ichiaba mia jara bi chi nechiaayaa bĩmaa waa nechianaamerã. Ma k'ãyaara mimia piata oopia bi, ne-inaa iru bamerã pichi juadoopa. M̃gá pia chupiria chedeerãmaa teei.

²⁹ Ik'achia pedee p'ananáati. Ma k'ãyaara pedee pia aupai jarapatáati, chi ũrirutaarãpa pia k'ĩsiadamerã m̃ik'aapa pia oodamerã. M̃gá parãpa ãchi k'aripadait'ee. ³⁰ Tachi Ak'õre Jaure t'ãri p'uapináati, parãpa m̃gee ne-inaa k'achia oo p'anipa. K'irãpátì iru k'aurepata k'awa p'anì tachi Tachi Ak'õredeerã. Iruta tachi ome bapariit'ee

na eujãdepema k'ap'ia deepa uchiarutamaa Cristo cheru ewate.

³¹ Mapa parãdepema apida nãgá baik'araa bi: t'ãri ãrii; k'ĩrauyaa; t'ãri k'achia; chõoyaa; ik'achia pedeeyaa maa-e pĩrã awaraarã ãpĩte pedee k'achia jarayaa; awaraarã k'ĩra unuamaa iru p'anapata. ³² Ma k'ãyaara, t'ãri pia para bati mãik'aapa chupĩria k'awaa para bati. Apemaarãpa ne-inaa k'achia oodak'ãri, perdonaapatãti, Tachi Ak'õrepa tachia k'achia oopata perdonaaparik'a Cristo piuda k'aurepa tachi pari.

5

Sãga Tachi Ak'õre warrarã p'anapata

¹ Tachi Ak'õrepa parã k'inia iru bapari ichi warrarã perã. Mapa k'awaa wãk'ãti wãti awaraarã k'inia iru p'anadait'ee irua tachi k'inia iru baparik'a. ² Chik'inia p'anapatãti Cristopa tachi k'inia iru baparik'a. Tachi mãgá k'inia iru bada perã, piuji tachi k'aripait'ee. Ichi k'ap'ia paara peepiji ak'ĩpiit'ee Tachi Ak'õre k'inia iru bi mãik'aapa eperãarã ichiaba k'inia iru bi. Maperãpi Tachi Ak'õrepa irua ooda pia ak'iji.

³ Tachi Ak'õrepa parã awara bida perã Cristok'a p'anapataadamerã, nãgee p'ek'au k'achia eperãarãpa oopata jida jaradaik'araa bi: miak'ãi p'aniirã awaraarã ome k'ãipata; k'ĩra nejasia wẽe awaraarã jiripata p'ek'au oodait'ee ãchi ome; awaraarã wẽra wa net'aa k'ĩapata. ⁴ Ichiaba parãpa nãgee k'achia oopata apida oodaik'araa bi: bisi pedeepata; pariatua pedeepata maa-e pĩrã bisi pedee pedeepata ëidamerã. Cristopa

apidaamaa mǎgá pedeepik'aa. Mǎgá pedeedai k'ǎyaara, gracias jarapatáati Tachi Ak'õremaa. ⁵ Parāpa k'awaadaipia bi chi nǎgee k'achia oopataarā Cristodeerā-e: pariatua p'ek'au oo wǎpata awaraarā ome; k'īra nejasia wēe awaraarā jiripata k'achia oodait'ee āchi ome; awaraarā wēra wa net'aa k'īapata. Mǎgeerā ne-inaa juapa ooda k'īrapite it'aa t'īpataarāk'api p'ani. Ne-inaa awaraa k'iniara iru p'ani Tachi Ak'õre k'ǎyaara. Mapa wǎda-e pait'ee iru truadee. ⁶ Mǎgee p'ek'au k'achia oopataarā atuadait'ee, Tachi Ak'õre k'īraupipata perā āchia k'achia oo jōnipa mǎik'aapa oodaamaa p'anapata perā irua oopi bik'a. K'ūrapináati mǎgee pariatua pedeepataarā apidaamaa, seewa jarateepata perā. ⁷ K'õp'ǎyo meraanáati mǎgee eperāarā ome.

⁸ Wāara naaweda ichiaba parā mǎgeerāk'a p'āriu pik'a bide p'anapachida, k'achiade p'anapataadap'edaa perā. Mamīda írá parā araa p'anadairā Tachi Waibia ome, ídaa pik'a bide p'anapata. Mapa p'anapatáati Cristodeerāk'a. ⁹ Eperā ídaa pik'a bide bak'āri, nǎga bapari: t'āri pia jōmaarā ome; oopari Tachi Ak'õrepa oopi bik'a; ichita wāarata jarapari. ¹⁰ Mapa k'awaa wāk'āti wāti mǎgá p'anapataadait'ee. Mǎgá Tachi Waibia o-ia bait'ee parā ome. ¹¹ Ijǎadak'aa beerāpa ne-inaa k'achia oodak'āri, t'īunáati āchi ome, āchi p'āriu pik'a bide p'anapata perā. Ma k'ǎyaara āchi ūrapatáati k'awaadamērā atuadait'ee āchia k'achia oopata k'aurepa. ¹² Tachi k'īra nejasiadarii nepiriit'ee āchia ne-inaa k'achia mera oopata. ¹³ Mamīda Tachi Ak'õrepa mǎgee p'ek'au k'achia

oopata paara wēpapii, ma eperāarāpa ũriruta pirā chi ĩdaa pik'a bide p'anīrāpa Tachi Ak'ōre Ũraa jaradak'āri. Māga ũridap'eda, k'awaadai āchia ne-inaa k'achia oopata. ¹⁴Māpai Cristode ijāaruta pirā, āchi ichiaba ĩdaa pik'a bide t'ĩudai. Mapa k'aride jara bi:

“Ƴrimāti parā k'āi pik'a p'anīrā, k'achia oomaa p'anadairā. P'irabāti parā piu pik'a p'anīrā, ijāadak'aa perā. Cristopa parā k'aripai ĩdaa pik'a bide t'ĩudamerā.”

¹⁵ Maperā k'ĩrak'aupai p'anadai k'ĩsia k'awa-ee beerāk'a. Ma k'āyaara k'ĩra jĩp'a, k'ĩsia k'awaa p'anapatáati. ¹⁶ Ichita jiripatáati ne-inaa pia oodait'ee, ĩrapemaarā k'achia ooyaa p'anapata perā. ¹⁷ K'ĩra k'awa-ee p'anīrāk'a p'ananáati. Ma k'āyaara jiripatáati k'awaadait'ee Tachi Ak'ōrepa parāmaa oopi k'inia bi. ¹⁸ It'uapa piu nipanáati, jāgipa eperāarā k'achiade baaipipari perā. Ma k'āyaara Tachi Ak'ōre Jaure ome o-ĭa nipapatáati oodait'ee irua parāmaa oopi k'inia bik'a. ¹⁹ Awaraa ijāapataarā ome p'anadak'āri, k'ari para bāti salmos Tachi Ak'ōre Ũraa p'ādadepema māik'aapa Ak'ōre k'ari. K'aripatáati Tachi Ak'ōre Jaurepa k'aripi bik'a. T'āripa k'aripatáati Tachi Waibiamaa, parāpa iru k'inia iru p'anapata perā. ²⁰ Tachi Waibia Jesucristode ijāapata perā, ichita gracias jarapatáati Tachi Ak'ōremaa, jōma irua oo bi pari tachi-it'ee.

Sāga p'anapataadaipia bi awaraa ijāapataarā ome

21 Ak'ipidait'ee Cristo wāara pāchi poro waibia, ũripatāati awaraa ijāapataarāpa ũraa p'ani māik'aapa oopatāati ārapa jara p'anik'a.

22 Wēraarāpa oopataadaipia bi āchi imik'īraarāpa jara p'anik'a, Tachi Waibiapa māga k'inia bairā.

23 Imik'īra chi wēra poro waibia, Cristo tachi ijāapataarā poro waibiak'a. Tachi ijāapataarā Cristo k'ap'ia apai pik'a p'ani. Iruata tachi o k'achiadeepa k'aripa ataji atuanaadamerā.

24 Mapa ijāapataarā Cristo jua ek'ari p'anapata. Māgá ichiaba wēraarā nejōmaade āchi imik'īraarā jua ek'ari p'anapataadaipia bi.

25 Imik'īraarāpa jōdee āchi wēraarā k'inia iru p'anapataadaipia bi, Cristopa ijāapataarā k'inia iru baparik'a. Irua tachi ijāapataarā audupai k'inia iru bada perā, piuji tachi pari. 26 Māgá tachi ijāapataarāpa p'ek'au k'achia oopata wēpapiji. Tachi sii pik'aji paniapa irude ijāa p'anida adak'āri, iru ũraa ũridap'eda. Māgá tachi ijāapataarā awara bijji ichi-it'ee. 27 Ara imik'īrapa wēra awēra k'īra wāree, t'āri pia, k'inia bik'a ai ome miak'āiit'ee, māga pik'a Cristopa k'inia bi tachi ijāapataarā Tachi Ak'ōre k'īra wāreek'a, t'āri pia, maarepida k'achia wēe p'anapataadamerā ichi-it'ee. Ma-it'eeta tachi awara bijji. 28 Cristopa tachi ijāapataarā, ichi k'ap'ia apai pik'a p'anirā, māgá k'inia iru bapari perā, imik'īraarāpa āchi wēraarā ichiaba k'inia iru p'anapataadaipia bi āchi k'ap'iak'a. Imik'īrapa ichi wēra wāara k'inia iru bak'āri, pia ak'i bapariit'ee, ichi k'ap'ia ak'i baparik'a. 29 Eperā apidaapa ichi k'ap'ia unuamaa iru bak'aa. Ma k'āyaara nek'opari māik'aapa ichi k'ap'ia pia ak'i bapari, Cristopa tachi

ijãapataarã ak'i baparik'a. ³⁰ K'awa p'anì Cristopa tachi ijãapataarã mǎgá ak'i bapari, tachi iru k'ap'ia apai pik'a p'anadairã. ³¹ Tachi Ak'õre Ũraa p'ãdade jara bi:

'Mapa imik'ĩrapa atabëit'ee chi ak'õre chi nawe ome, araa p'anapataadait'ee chi wëra ome. Mǎgá eperã omee weda eperã apai pik'a p'aneedait'ee.' (Gn 2.24)

³² Mǎgí jarada k'aurepa tachia ne-inaa wāarata k'awaadai, waide k'awada-e p'anadap'edaa. Mi-it'ee nǎga bi. Cristo tachi ijãapataarã ome, imik'ĩra chi wëra ome bik'a bi. ³³ Mapa waya jara k'inia bi parãmaa: Imik'ĩra chaa ichi wëra k'inia iru baipia bi ichi k'ap'ia k'inia iru baparik'a. Jõdee wëra chaa ichi imik'ĩra waaweeipia bi ichi poro waibia'ak'a.

6

Ũraa warrarã mǎik'aapa ak'õreerã-it'ee

¹ Írá mia ũraait'ee warrarãmaa: Warrarã, parãpa Tachi Waibia k'inia iru p'anadairã, oopatáati pǎchi ak'õreerãpa jara p'anik'a. Mǎga k'inia bi Tachi Ak'õrepa parãpa oodamerã. ² Iru ũraa p'ãdade jara bi:

'Pǎchi ak'õre mǎik'aapa pǎchi nawe k'inia iru baparíji mǎik'aapa ãra pedee ũriparíji.' (Ex 20.12)

Tachi Ak'õrepa jarak'ãri warrarãpa mǎga oodamerã, ichiaba jaraji sǎga k'aripait'ee chi ma jaradak'a oopataarã. ³ Mǎgaji:

'Pǎchi ak'õreerã pedee ũriruta pirã, pia p'anapataadait'ee mǎik'aapa taarã

nipapataadait'ee na p'ek'au eujãde.' (Ex 20.12)

⁴ Ak'õreerã, pãchi warrarã k'ĩraupináati. Ma k'ãyaara pia ak'i p'anapatáati. Mãga oo p'ani misa, ũraapatáati ne-inaa k'achia oonaadamerã. Ma awara jarateepatáati Tachi Waibiade ijãapataadamerã mãik'aapa oopataadamerã irua oopi bik'a.

Ũraa esclavoorã-it'ee mãik'aapa ãchi chipariirã-it'ee
(Col 3.22-25; Tit 2.9-10; 1 P 2.18-20)

⁵ Esclavoorã, oopatáati parã na p'ek'au eujãdepema chipariirãpa jara p'anik'a. Æra waawepatáati mãik'aapa k'ĩra jĩp'a mimiapatáati, Cristo-it'ee mimiak'ajidak'a. ⁶ Edaare esclavo k'ĩra jĩp'a mimiapari chiparipa ak'i bi misa aupai, ichi mimiayaa bida amerã. Mamĩda parãpa mãga oodaik'araa bi. Ma k'ãyaara auk'a k'ĩra jĩp'a mimiapataadaipia bi, chipariirãpa ak'ida-e p'ani pijida. Mãgá t'ãripa ichiaba oopatáati Tachi Ak'õrepa oopi bik'a, Cristo parã chipari jõmaarã k'ãyaara waibiara bairã. ⁷ Maperãpi parã mimiadai k'ãyaara chi mimia chipariirãpa parã pia ak'idamerã, t'ãripa mimiadaipia bi Tachi Waibia-it'ee. ⁸ Mãga oodaipia bi k'awa p'anadairã chi mimia pia oo bĩpa iru bait'ee jõma Tachi Ak'õrepa k'ĩsia iru bi teeit'ee ichideerãmaa. Esclavoorã, esclavo-eerã auk'a mãga iru p'anadait'ee ãchi mimia pia oopata pari.

⁹ Parã, chi esclavoorã chipariirã ichiaba pia p'anapatáati pãchi esclavoorã ome. Ijĩati pedeenáati p'eradamerã. K'irãpapatáati parã it'ari

chipari ichiaba iru p'ani. Māgí Tachi Waibia Jesucristo. Iruata esclavo chipari pipiara ak'ik'aa chi esclavo k'āyaara, ichideerā jōmaweda iru k'īrapite auk'a p'anadairā.

Armadura Tachi Ak'ōrepa teepari Cristode ijāapataarāmaa

¹⁰ Īpemaarā Cristo k'aurepa, ĩrá mia parā ūraait'ee t'āridepai choopataadamerā, araa p'anadairā Tachi Waibia ome. Iru jōmaarā k'āyaara waibia bairā, parā k'aripait'ee oodamerā irua k'inia bik'a. ¹¹ Nāgá tachi k'aripait'ee. ĩrapema soldaorāpa armadura jīpatak'a, Tachi Ak'ōrepa armadura teeda jīpatáati, Netuara Poro Waibia para parā k'ūranaamerā. ¹² Tachi chōoda-e p'ani eperāarā jīp'arā ome. Jīp'a chōo p'ani na p'ek'au eujādepema-eerā ome; chi Netuara Poro Waibia eere p'anīrā ome. Māgīrā jua ek'ari na p'ek'au eujādepema ijāadak'aa beerā jōmaweda p'āriu pik'a bide p'anapata. ¹³ Maperā Tachi Ak'ōrepa teeda armadura jōmaweda jīpatáati. Māgá Netuara Poro Waibia eere p'anīrā chedak'āri parā k'achiade baaipidait'ee, parāpa māga oopida-e pait'ee. Mapa Tachi Ak'ōrepa oopi bik'a oo wāk'āti wāti, māgīrā p'oyaadait'ee āchi cheruta cha.

¹⁴ Māga p'anadait'ee nāga oopatáati: soldaorāpa ne-inaa k'irride jīpatak'a, māga pik'a Tachi Ak'ōrepa wāarata jara pēida k'awáati māik'aapa ichita wāarata jarapatáati. Soldaorāpa camisa hierrodee ooda jīpatak'a, māga pik'a Tachi Ak'ōrepa oopi bik'a ichita oopatáati, netuara eere p'anīrāpa maarepida parāmaa k'achia oonaadamerā. ¹⁵ Soldaorāpa chancla jīpatak'a

awara āyaa wādait'ee pak'āri, māga pik'a k'awáati jarateedait'ee Cristopa tachi o k'achiadeepa k'aripa atak'āri, k'āiwee p'anapata, netuara eere p'anirāpa nepirade baaipi cheruta pijida. ¹⁶ Soldaorāpa escudo atepatak'a, māga pik'a waapiara Cristode ijāpatáati. Māgá jaut'i pik'a p'anadai Netuara Poro Waibiapa k'achia oopi k'inia bi parāmaa. ¹⁷ Soldaorāpa casco jipatak'a, māga pik'a wāara ijāpatáati Tachi Ak'ōrepa parā o k'achiadeepa k'aripa ataji. Ma awara soldaorāpa espada atepatak'a, Tachi Ak'ōre Ūraa jara pēida ichi Jaure k'ap'ia pari t'āride atéeti.

¹⁸ Oodait'ee ma jōma et'ewa jarada, ichita it'aa t'ipatáati Tachi Ak'ōre Jaurepa oopi bik'a. It'aa iidipatáati Tachi Ak'ōrepa parā k'aripamerā ne-inaa jōmaade. K'irak'aupai it'aa t'ida-ee p'anapataadai. Ma k'āyaara jōmaarā ijāpataarā pari it'aa t'ipatáati. ¹⁹ Ichiaba it'aa t'ipatáati mi pari, Tachi Ak'ōrepa ichia jara k'iniata mimaa jarapimerā. Iidipatáati mia jōmaarāmaa waawee-ee k'awapimerā Tachi Ak'ōrepa k'isia iru bada eperārā o k'achiadeepa k'aripa atait'ee, ichi Warra pēik'āri piumerā eperārā pari. ²⁰ Cristopa mi pēiji māga jarateemerā. Ma jaratee bi k'aurepata mi nama carcelde bi. Mamida it'aa t'ipatáati, mia at'āri waawee-ee māga jarateemerā Tachi Ak'ōrepa k'inia bik'a.

Pablopa salude tee pēida na k'art'a p'ā aupa wāk'āri

²¹ Mia na k'art'a pēiru tachi ipema Cristo k'aurepa Tíquico ome. Mia iru k'inia iru bi, k'ōp'āyo pia perā. Irua mi ichita k'aripapari,

Tachi Ak'õrepa oopi bik'a oo k'inia bairã. Irua parãmaa nepirĩnait'ee mia k'ĩsia bi mãik'aapa mia oomaa bi, parãpa ma jõma k'awaadamerã. ²² Ma-it'ee mia iru pëiru, parãpa pia k'awaadamerã tai p'anapata mãik'aapa t'ãri o-ĩa p'aneedamerã irua jararu ũridak'ãri.

²³ Írá mia it'aa iidi bi Tachi Ak'õrepa mãik'aapa Tachi Waibia Jesucristopa parã k'ãiwee p'anapimerã jõmaarã ijãapataarã ome mãik'aapa chik'inia p'anapimerã, Cristode ijãapata perã.

²⁴ Ichiaba iidi bi ãrapa pia ak'i p'anadamerã jõmaarã t'ãripa Tachi Waibia Jesucristo k'inia iru p'anapataarã.

Mãgapai paji.

Tachi ak'õre pedee
New Testament in Epena (CO:sja:Epena)

copyright © 2005 Wycliffe Bible Translators, Inc.

Language: Epena

Translation by: Wycliffe Bible Translators, Inc.

Epena

sja

Colombia

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Epena

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files dated 29 Jan 2022

1e08d4cb-71aa-5440-b08f-b522fabb6441